



La stretga da Porclas è colliada fermamain cun la legenda da las «valorusas Lumnezianas». LITOGRAFIA ENTURN IL 1820



Vella – il lieu principal da la Lumnezia.

# En la part dadora da la Val Lumnezia

Scuvertas tranter Porclas e Vattiz

■ **Geograficamain è la Lumnezia rumantscha spartida en duas parts: a la Lumnezia Sut appartegnan ils vitgs che giaschan en il fund da la val, situads al stradun en direziun Val S. Pieder; la Lumnezia Sura cumpiglia ils vitgs al pe dal Piz Mundaun e Piz Sezner e tanscha enfin a Vrin.** Noss viadi maina oz en la part dadora da la Val Lumnezia, en ils abitadis situads al pe dal Mundaun.

## Porclas

Portals, saivs u mirs da serra en stretgas da la val a Trin e Cumbel. Il toponim deriva dal latin *portula* e cumpara era a Scharons, Vaz ed en il Mesauc. A Cumbel designescha il num Porclas (a 1019 m), localisà al stradun 1 km al sid dal cunfin communal cun Luven, il cunfin tranter ils circuits da la Lumnezia e da la Foppa. A Porclas existiva antruras probablmain ina serra da la val. Il portal anc oz existent (construì probablmain enturn 1300, restaurà il 1858 ed il 1912) ha in artg a piz e pudeva vegnir serrà cun duas alas. La stretga vegn era numnada Porta da femnas, sa referind a la legenda, tenor la quala las dunnas lumnezianas duain avair cumbattì qua ils 12 da matg 1352 cunter ina truppa dal cont de Werdenberg en la Faida da Belmont.

Martin Bundi

## Cumbel

Vischnanca politica, circuit Lumnezia, district Surselva (avant il 2001 Glogn), situada lung la via a l'entrada en la Val Lumnezia. Ca. 825 *Cumble*, fin il 1983 *Cumbels*. 1850 278 abitants; 1900 342; 1910 275; 1941 331; 1950 298; 1990 257; 2000 288. Quatter chats da fossas dal temp precristian. A partir dal 13avel tschientaner, ensemen cun las autras vi-

schnancas da la Lumnezia, part dal feud da l'investgieu da Cuira, administrà dals signurs de Belmont. La porta da las dunnas a Porclas fa endament il sustegn militar presuntiv da las dunnas lumnezianas durant la guerra cunter ils conts de Werdenberg-Sargans (1352). Il 1371 avevan ils Lumerins ils dretgs suverans, a partir dal 1390 ils signurs de Sax-Mesauc. Il 1538 è Cumbel sa cumprà liber da l'investgieu ed ha furnà fin il 1851, ensemen cun Peiden e Camuns, in vischinadi. L'onn 825 è documentada la chaplutta da S. Murezi sper Valgronda. La baselgia da S. Steffan, erigida probablmain a l'entschatta dal 16avel tschientaner, ha appartegnì fin il 1653 a quella da S. Vintschegn a Pleif/Vella. En ils onns 1649–1923 è ella vegnida pastorada da paders chaputschins, alura da spirituals seculars. Dapi il 1970 collavura Cumbel stretgamain cun Morissen (meglieraziun generala 1968–96, cooperaziun en fatgs da scola e d'uniuns dapi il 1980). Il 2005 lavuravan var 17% da las personas cun activitad da gudogn a Cumbel en il sectur primar resp. secundar, 66% en il sectur terziar, numerus pendularis ordaifer. Il 1977 è vegnida construìda a Cumbel ina chasa d'attempads per la Lumnezia. Part da la populaziun da lingua rumantscha: 2000 85,1%/92,7% (meglra lingua/tuttas indicaziuns).

Adolf Collenberg

## Morissen

Vischnanca politica, circuit Lumnezia, district Surselva (avant il 2001 district Glogn), situada al pe sid dal Piz Mundaun sur la via da la Lumnezia. 1210 *Mureizens*. 1850 250 abitants; 1900 163; 1950 297; 2000 211. Territori abità probablmain da vegl ennà. Dal 13avel fin il 15avel tschientaner èn attestads mi-

nisterials omonims. Enturn il 1290 possedeve l'investgieu da Cuira bains feudals a Morissen. Fin il 1370 ha Morissen fatg part sco feud episcopal a la prefectura dals Belmont, alura a quella dals de Sax-Mesauc. Il 1538 ha la vischnanca cumprà ora ils dretgs feudals episcopals. La baselgia da S. Giachen e S. Cristoffel, menziunada il 1345 e consecrada suenter la reconstrucziun dal 1867–68 a S. Giachen e S. Filip, è stada fin il 1907 ina filiala da la baselgia da S. Vintschegn a Pleif/Vella (chaplania 1702, curazia 1806). Situada a la via da transit da Sursaisa al Cuolm Val, è Morissen s'unì economicamain en il temp medieval tardiv cun Surcuolm, il vischinadi «da l'autra vart da la muntogna». Il 1630 èn las duas vischnancas sa separadas en consequenza d'in conflict permanent per l'utilisaziun dal gaud e da la pastgira sin la spunda nord dal Piz Mundaun (pastgira cuminaivla cun Surcuolm fin il 1895). La vischnanca purila rumantscha, basada sin l'allevament da muvel e l'economia da latg, ha realisà il 1973–79 ina meglieraziun generala. A l'entschatta dal 21avel tschientaner sa distingua la vischnanca tras numerus pendularis a Glion e Domat, pauc commerzi local ed in svilup turistic limità (chalets da vacanzas). Consorzi da scola cun Cumbel dapi il 1980, a partir da l'onn da scola 2009/10 era cun Suraua (scola primara Lumnezia Dadora). In center communal exista dapi il 1992. Il 2005 eran occupadas 77% da las personas cun activitad da gudogn a Morissen en il sectur primar. Part da la populaziun rumantscha: 2000 91,5% 95,3 % (meglra lingua/tuttas indicaziuns).

Adolf Collenberg

## Vella

Vischnanca politica, circuit Lumnezia,

district Surselva (avant il 2001 Glogn), situada sin ina terrassa en la part centrala da la Lumnezia, cun il vitg da Vella e la baselgia da S. Vintschegn sut il vitg a Pleif (cun la chasa-pravenda e la chasa dal caluster). Ca. 840 *ad sanctum Vincentium* [...] *in valle Leguntia*, 1290–98 *ad Ville*, *apud Villam*, tudestg Villa (uffizial fin il 1987). 1808 199 abitants; 1835 301; 1850 229; 1900 272; 1950 418; 1990 398; 2000 441. A Pleif existan fastizs d'in abitadi dal temp da bronz tardiv e chats da munaida da la sava dal terz al quart tschientaner. La baselgia parochiala da S. Vintschegn cun sia substanza architettonica romanico-gotica (reconstruìda il 1661–62), menziunada per l'emprima giada enturn l'onn 843 sper in bain roial, valeva sco bain feudal imperial. Pli tard è ella ida en possess dals Welfs ed enturn la mesadad dal 10avel tschientaner al chapitel catedral da Constanza. Il 1204 aveva il prevost dal chapitel da Constanza il dretg da patronadi sur la baselgia. En il 14avel tschientaner era ella en possess dals signurs de Belmont, il 1371 dals baruns de Sax-Mesauc (iarta) ed il 1483 da l'investg da Cuira. La baselgia (en possess dal cumin da la Lumnezia) era il center d'ina gronda pravenda da vallada che cumpigliava l'entira regiun da la posteriura dretgira auta da la Lumnezia. Durant la colonisaziun intensiva tras ils Gualsers è sa separada la Val S. Pieder ecclesiasticamain da Pleif (ca. 1300). La baselgia da S. Maria a Degen/Fraissen era sa liberada gia pli baud ed aveva furnà in'atgna pravenda pitschna. Lumbrein è sa separada tranter il 1345 ed il 1442, Duvin il 1526, Surchasti cun Tersnaus e Camuns il 1528, Vrin il 1597, Surcuolm il 1643, Cumbel il 1653, Vignogn il 1697, Degen cun Rumein e Vattiz il 1891, Morissen il 1907 e Peiden il 1910. A la fin dal 13avel tschientaner èn idas diversas miigiurias en possess episcopal. Grazia a sia funcziun da center ecclesiastic ed a l'influenza da la famiglia patriziana de Mont, ch'ha appartegnì a la classa dirigenta da la Lumnezia e da la Lia Grischa dal 15avel fin il 19avel tschientaner, è Vella daventà il lieu principal da la val. A Vella sa raduna la dretgira cirquitala ed – en roda cun auters lieus – era il cumin. La vischnanca dispona dapi il 1887 d'ina scola secundara cirquitala. Dapi l'avertura da las Penderas Val Lumnezia SA (1970) è vegnì mess a disposiziun dapli spazi d'abitat per il turissem (d'enviern). Il 2002/03 offriva Vella 494 letgs en la parahotellaria. Entant che l'agricultura tradiziunala tschessa, creschan dapi il 1980 ils secturs secundar e terziar. Meglieraziun generala 1977–2007. Part da la populaziun da lingua rumantscha: 2000 83,9%/92% (meglra lingua/tuttas indicaziuns).

Ursus Brunold

## Degen

Vischnanca politica, circuit Lumnezia, district Surselva (fin il 2001 Glogn). La vischnanca è situada sin ina terrassa 200 m sur la val dal Glogn e cumpiglia, ultra da la plav da Degen sortida da las trais curts da Fraissen, ils dus aclauns da Rumein e Vattiz. Ca. 840 *HigenaelEgenae* (Degen), *villa Ramnensis* (Rumein), 1325 *Vatigis* (Vattiz), tudestg Igels (fin il 1983). 1808 232 abitants; 1850 255; 1900 214; 1950 323; 2000 247. Durant il temp medieval è l'istorgia da Degen sa splegada en accord cun quella da la Lumnezia. Ecclesiasticamain furmavan las trais curts da Fraissen, ensemen cun Zervreila en la Val S. Pieder, gia avant il 1345 ina plav independenta da la baselgia da vallada da Pleif/Vella. Degen-Vitg, Rumein e Vattiz èn vegnids incorporads pir il 1891 en la plav da Degen. Sco la baselgia da S. Victor vegn era quella da Nossadonna menziunada gia en l'«Urbari curretic dals bains imperials» (ca. 840). La baselgia cun sala ed apsida, consolidada en furma da trapez, datescha probablmain dal 8avel tschientaner. L'altar grond è vegnì consecrà il 1491, l'edifiz actual il 1504. Dapi la fin dal 13avel tschientaner dispona Degen era d'ina chaplutta, deditgada a s. Bistgaun. En il context da la pietusadad barocca èn naschidas ulteriuras chapluttas a Rumein (1669) ed a Vattiz (1700). Il legat da vasts bains tras familias indigenas (1712/37) ha obligà la claustra da Mustér da laschar pastorar la chaplania da Rumein en permanenza tras in conventual. Il 1923 ha Degen obtegnì l'access a la via lumneziana, construìda il 1886–87. Il 1930 è l'aclaun da Vattiz vegnì destrui quasi totalmain tras in incendi. La vischnanca da Degen è stada ina da las emprimas en il Grischun ch'ha arrundà il fons (1942–47 e 1968). Il project per la realisaziun d'ina culegna da vacanzas (Vallada Nova) sur Vattiz, lantschà en ils onns 1975–80, n'è betg vegnì concretisà. Planisaziun locala 1974 e 1990, meglieraziun da fons Degen-Vignogn 1968–99. Il 2005 lavuravan 55% da las personas cun activitad da gudogn a Degen en il sectur primar, 22% en il sectur secundar e 23% en il sectur terziar.

Duri Blumenthal



L'Open Air Lumnezia a Degen è il pli grond festival da musica en il liber dal Grischun.

## Lexicon Istoric Retic

Il LIR cumpiglia bundant 3100 arttgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.